



Director di Serlimar durante reunion na Parlamento:

Ley di Serlimar ta un ley existente cu ta wordo adapta

ORANJESTAD (AAN): Diaranzon mainta den Parlamento a inicia e tratamento di e Ley di Serlimar. DIARIO a combersa cu Director di Serlimar, Henley Davelaar kende a expresa cu esaki tabata un dia crucial. El a indica cu esaki ta un ley existente cu ta wordo adapta. "No ta un ley nobo cu ta wordo crea awe", a bisa. E controversia ta wordo crea for di sector priva. Segun Davelaar, Minister Otmar Oduber a hiba un discurso hopi cla cu tur hende por a comprende. Tin basta hende caba sacando e mensahe den medianan di comunicacion di kico ta e motibo y kico ta e importancia di e ley aki. E ta kere cu controversia ta un cos mundial y semper ta bay haya e tipo di casonan aki. Pero nan ta kere cu e mensahe a yega na e pueblo, parlamento y cu tur hende ta mira e necesidad y importancia di e ley aki, a indica.

E director di Serlimar a duna di conoce cu mester tene pa cuenta cu e parti di procesamento y maneho di desperdicio, cual na final di dia ta yega cerca Serlimar. Tin Parkietenbos y Seroe Tjishi. Tur compania por handle sushi pero na final di dia nan ta yega cerca Serlimar. E gastonan di mantene Parkietenbos y Seroe Tjishi ta hopi mara na nan. Ekipa, cobamento, personal, e becindario, etc, Davelaar a laga sa.

Teniendo na cuenta e parti humano tambe pesey ta importante pa tin e fondonan pa haci e maneho di desperdicio na un manera responsabel cu ta baha e cantidad di kehonan den e becindario, a splica.

No kier pa ningun ciudadano tin malesa pa despues bira un epidemia. Esaki ta e cosnan cu por ehempel, kier. E heffing di turismo, di companianan di Camara di Comercio, di modo cu ta haya e fondonan necesario pa duna gobierno espacio



pa uza e fondonan cu tabata tin liber, pa por inverti den metodonan duradero manera un incinerator grandi. E idea ta pa e fondonan aki yuda baha e subsidio di gobierno na Serlimar di modo cu gobierno por uza e parti

ey pa inverti den metodonan duradero, a reitera.

Henley Davelaar a indica cu a duna caba un presentacion na Raad van Advies, Parlamento a haci su preguntanan y a yuda Minister Oduber contesta e pre-



guntanan. E por parce un ley complica, pero manera cu a hiba e mensahe den prensa e ta duidelijk pa tur hende aworaki.

Tin algun nota di cambio cu ta bin acerca cu ta cosnan valido. El a menciona

por ehempel e hendenan cu tin un eenmanszaak y cu ya caba ta pagando e 25 florin na nan cas y cu no ta husto pa nan tambe bay paga e heffing di comerciante.

Esey entre otro ta un nota di cambio, a bisa.